

## SIARAN MEDIA

### 1,500 BUBUR LAMBUK DISEDIAKAN WARGA KOLEJ KOMUNITI SELAYANG KEPADA KOMUNITI

**SELAYANG, 21 MAC 2025** – Para pelajar dan kakitangan Kolej Komuniti Selayang (KKSy) bergotong-royong menyediakan 1,500 bekas bubur lambuk untuk diedarkan kepada 25 agensi dan komuniti sekitar Selayang sempena Majlis Semarak Ramadan 2025.

Aktiviti memasak bubur lambuk ini melibatkan 400 pelajar dan 60 kakitangan KKSy yang bersama-sama menyediakannya sejak awal pagi bagi memastikan juadah tradisi ini dapat dikongsi dengan masyarakat setempat di samping mengetengahkan bakat dan kemahiran warga KKSy yang dikenali dalam bidang hospitaliti. Inisiatif ini bukan sekadar amalan bersedekah tetapi juga mendidik pelajar tentang kepentingan nilai gotong-royong, kesyukuran dan kasih sayang dalam komuniti.

Selain agihan bubur lambuk, program ini turut dimeriahkan dengan penyediaan juadah berbuka puasa, Khatam Al-Quran, Ceramah Nuzul Al-Quran, serta penyerahan wafiah Rakan Belia YADIM sebagai tanda amanah kepada generasi muda dalam menyebarkan nilai murni. Selain itu, sumbangan **kotak bantuan** kepada pelajar, kakitangan dan komuniti juga telah disampaikan oleh YB Tuan William Leong Jee Keen, Ahli Parlimen Selayang membuktikan keindahan Ramadan sebagai bulan memberi dan berkongsi rezeki.

“Bantuan ini bukan sekadar pemberian barangan keperluan, tetapi lebih daripada itu dan ia adalah simbol kasih sayang, sokongan, dan keprihatinan kita terhadap kesejahteraan para pelajar dan penerima yang lain,” ucap beliau sewaktu program ini.

Tambah beliau lagi, sumbangan ini diharap dapat membantu meringankan beban dan memberi motivasi untuk penerima khususnya para pelajar untuk terus berusaha dalam pelajaran masing-masing.

Program ini diteruskan dengan sesi berbuka puasa beramai-ramai dan diakhiri dengan solat tarawih berjemaah, mencipta kenangan bermakna antara pelajar, kakitangan dan tetamu yang hadir.

Majlis ini tidak akan berjaya tanpa sokongan semua pihak termasuk Yayasan Dakwah Islamiah Malaysia (YADIM), YB Tuan William Leong Jee Keen, Ahli Parlimen Selayang, serta rakan-rakan kerjasama yang turut menyumbang kepada kejayaan program ini.

**-TAMAT-**

Kolej Komuniti Selayang adalah institusi pendidikan terbuka kepada semua tanpa mengira batasan umur yang menyediakan 6 program sijil dan 1 program Diploma serta salah satu hab Pembelajaran Sepanjang Hayat dalam memberi latihan kemahiran berdasarkan permintaan industri dan keperluan semasa.

**NUR IZZATI ISMAIL**  
**011-37486194**  
**UNIT KOMUNIKASI DAN HUBUNGAN KORPORAT**  
**KOLEJ KOMUNITI SELAYANG**  
**21 MAC 2025**



1500 bubur lambuk disediakan KKSy



Ahli Parlimen Selayang, YB Tuan William Leong Jee Keen di Majlis Semarak Ramadan



Pelajar merewang menyediakan 1500 bubur lambuk

#### Pautan Gambar -

<https://drive.google.com/drive/folders/1zGQ765tkr61S9luWq5cOMilPmv2Aa6wY?usp=sharing>